


**Uorden da sepultura e santeri
dalla vischnaunca**



SIAT

Uorden da sepultura e santeri dalla vischnaunca da Siat

I. Basa, proprietad e survegionza suprema

Art.1 Basa

Sebasond sin igl art. 12 dalla lescha davart ils fatgs da sanadad dil cantun Grischun (lescha da sanadad) (BR 500.000) dils 2 da december 1984, sin l'ordinaziundavart ils fatgs da sepultura pil cantun Grischun (BR 508.100) relaschada dalla regenza ils 27 d'october 1998, e sin igl art. 3 dalla constituziun dalla vischnaunca da Siat dils 04 d'avrel 1997 relai la vischnaunca da Siat quest uorden da sepultura e santeri.

Art. 2 Proprietad

Il santeri ei proprietad dalla fundaziun baselgia s.Flurin, e vegn mantenius dalla vischnaunca politica. La preit dad urnas ei proprietad dalla vischnaunca politica Siat.

Art. 3 Egalitad da schlatteinas

Las stipulaziuns en quest uorden valan per persunas e funcziuns dad omisduas schlatteinas.

Art. 4 Organs

La suprastonza communal ei igl organ suprem davart ils fatgs da sepultura. Il cau dil departament da vias ed uaul surveglia ed ordeina l'execuziun dallas lavurs necessarias.

II. Organs e lur obligaziuns

Art 5 Suprastonza communal

La suprastonza communal ha las suandontas obligaziuns:

- survegliar igl entir menaschi da santeri e sepultura
- ordinar il diever e manteniment dil santeri
- eleger il persunal da survetsch per il santeri

Art.6 Cau-santeri

Il cau dil departament da vias ed uaul ei il cau-santeri, el ha da:

- surdar las necessarias incaricas al persunal da santeri
- procurar per in bien manteniment dil santeri e fossas
- survegliar il metter la crusch, crap-fossa e la rama.

Art. 7 Canzlia communal

Il canzlist communal ni il president communal han da:

- prender encunter l'annunzia da mort
- incaricar il caluster da tucclar da miert
- procurar che la fossa vegni cavada ad uras
- procurar che la caplutta da morts vegni endrizzata

Art. 8 Cava-fossa

- arver la fossa tenor las mesiras prescrettas entochen il gi avon la sepultura
- metter pli profund restonzas d'anteriuras sutteradas
- curclar la fossa e fermar la crusch-lenn
- mantener schuber las vias, pastgets sin santeri
- rumir la neiv e metter glera sin vias da glatsch
- sclauder e svidar lingias d'aua en cass da scheltira
- gidar sche necessari tier la sepultura
- haver quitau dils uaffens e dils utensils da satrar.

II. Uorden da sepultura

Art. 9 Obligaziun d'annunzia

Tuts cass da mortoris sigl intschess dalla vischnaunca da Siat ein d'annunziar ladinamein al miedi cumpetent per l'urentada dalla bara e per schar dar igl attest da mort. Silsunter ei l'annunzia da far alla canzlia communal.

Tgi ch'ei staus perdetga dalla mort d'ina persuna nunenconuschenta, che ha anfiu ina bara ni tgi che ha enconuschientscha d'in cass da mort ord motivs extraordinaris, ei obligaus d'annunziar quei immediatamein allas autoritads cumpetentas.

Art. 10 Il dretg da sepultura

Il dreg da sepultura en santeri public han, independentamein dalla religiun:

- tuts domiciliai en vischnaunca
- tuts quels ch'ei morts sin territori da nossa vischnaunca

Cun lubientscha dalla suprstonza communal sa quei dretg era vegnir concedius a burgheis/as da Siat che habiteschan ordeifer ni defuncts che havevan ina relaziun speciala cun la vischnaunca ni convischins da Siat.

Sin giavisch dil defunct ni sia parantella sa la suprstonza communal cumpetenta era lubir la sepultura en in auter santeri public. En quei cass crodan las obligaziuns da nossa vischnaunca.

Art. 11 Satrar/tschentar l'urna

Ei stat liber alla parantella – risguardond il giavisch dil defunct/a da decider da satrar en fossa sutterrada, da schar cremar e tschentar l'urna en ina nischa dalla preit dad urnas ni da schar cremar e satrar l'urna en ina fossa existenta. Vegn quei buca fatg dalla parantella, decida la suprstonza communal. Ella preit dad urnas sa mintgamai vegnir tschentau maximum treis urnas per nischa. Priu che la preit dad urnas ei pleina, sa l'urna vegnir sutterada excepziunalmein en ina fossa nova.

Sutteradas e cremaziuns astgan succeder sil pli baul 48 uras e sil pli tard 72 uras suenter la mort. Per cass specials sa il miedi districtual dar ina lubientscha execeziunala.

Procurar per il vischi e la crusch lenn ni procurar per l'urna sco era far las necessarias preparativas per metter en vischi ni la cremaziun ei caussa dalla famiglia en malencurada. Il transport dalla bara ella caplutta da morts e sin santeri ei caussa dalla parantella. Las prescripziuns dalla confederaziun e cantun restan resalvadas.

Reservaziuns d'ina nischa ella preit dad urnas ei sclausa.

Art. 12 Caplutta da morts

La caplutta da s. Ambrosi, Tuf stat a disposiziun alla famiglia en malencurada per tschentar la bara ni l'urna entochen tier la sepultura. La caplutta vegn endrizzada e schubergiada d'ina persuna incumbensada entras la vischnaunca.

Art. 13 Survetsch dalla vischnaunca

Dat ei negina parantella ni ei quella buca cudischada culs fatgs da sepultura metta la vischnaunca, sin giavisch, a disposiziun ina persuna da confidanza ed agid per la preparaziun dalla sepultura. L'indemnisaziun succeda tenor lavur e survetsch.

Per il pushegn da bara metta la vischnaunca a disposiziun, tenor giavisch, las localitads necessarias.

Art. 14 Tuchiez

Per annunziar la mort d'in/a convischin/a vegn tuccau, indepedentamein dalla religiun, tenor igl uorden da tuchiez dalla vischnaunca da Siat.

Art 15 Riug da bara

Arranschaments dil riug da bara culs uffecis parochials cumpetents ei caussa dalla famiglia en malencurada.

IV. Uorden da santeri

Art.16. Register da fossas

Davart l'occupaziun dil santeri meina la canzlia in plan, el qual igl ei d'imputar successivamein il num, prenum, onn da naschientscha e mortori da tut ils satrai e da tut las urnas sin santeri.

Art.17. Schurmetg dil santeri

Il santeri survescha al davos ruaus terester dils defuncts. Igl ei obligaziun da tener quei liug en honor, da mantaner el en bien uorden e d'observar silenzi e disciplina conform alla dignitad dil liug. Igl ei scumandau da prender animals en santeri.

Art.18 Manteniment dil santeri

Ils cuosts per l'erecziun, manteniment, engrondiment, mirs ed indrez dil santeri sco era per tuts utensils da cavar fossa ei caussa dalla vischnaunca.

Curdems e zerclems ein d'allontanar ord santeri e quei sin deponia dalla vischnaunca resp. sin la dismessa da rumians.

Art.19 Fossas sutterradas

Las fossas vegnan tschentadas en retscha successiva tenor il plan da santeri. Fossas privatas e da famiglia vegnan buca concedidas, (excepiu urnas tschentadas en fossas existentas, art.11).

Grondezia dalla fossa senza rama:	liung 220 cm, lad 100 cm, profund 150 cm
Gondezia dalla fossa cun rama per carschi ed affons sur 10 onns:	liung 140 cm, lad 60 cm
Grondezia dalla fossa d'affons sut 10 onns:	liung 95 cm, lad 45 cm

La distanza denter las fossas enramadas; mesira 30 cm, la ladezia dallas vias munta 80 cm

Tuttas fossas ston vegnir implantadas a digna moda e mantenidas bein en uorden entochen lur dismessa. La plantaziun ed il manteniment ei caussa dalla parantella.

Il plaz liber denter las fossas (30 cm) ei da cultivar e da zerclar dils possessur dalla fossa mintgamai davart seniastra. Medemamein ei la via (80 cm) da cultivar e da zerclar dils possessurs dalla fossa davon.

Igl ulteriur plaz dil santeri vegn cultivaus e mantenius dalla vischnaunca.

Art.20 Crusch fossa e rama

Sil pli trad sunter 12 meins dapi la sepultura sto mintga fossa vegnir munida cun ina rama e cun ina crusch fossa ni monument. Cruschs e monuments, procurai dalla parantella, ston s'accordar e s'adattar al contuorn ed asgtan esser fabricai ord fier, crap ni lenn. La crusch ni il monument fossa cuntegn silmeins il num, prenum, onn da naschientscha e da mortori dil defunct/a. En l'altezia astgan cruschs e monuments da fossa buca survargar 1.40 m la surfatscha dalla tiara, en la ladezia buca 60 cm. La rama provisorica, offerida dalla vischnaunca, sto vegnir tschentada dalla parantella.

Art 21 Urnas e tablas d'inscripziuns

Urnas ein per regla da tschentar ella nischa dalla preit d'urnas. Sin giavisch dalla parantella vegn ei lubiu da sutterar urnas en ina fossa existenta (art.11). Las urnas ein da tschentar en ina profunditad da 80 cm.

Sil pli tard 3 meins sunter che l'urna ei vegnida tschentada ella nischa dalla preit dad urnas sto la parantella procurar per l'inscripziun da tala. Quei succeda cun retrer la tabla d'inscripziun tier il luvrer communal. Sin la tabla ei d'inscriver il num, prenum, onn da naschientscha e da mortori dil defunct/a. Il cuosts dall'inscripziun paga la famiglia en malencurada.

Il tschentar matgs fluras tagliadas sil pastget ei lubiu.

Art.22 Temps da ruaus per fossas

Il ruaus dallas fossas sutteradas cuoza silmeins 20 onns. Vegn in'urna sutterrada, sin giavisch dalla parantella, en ina fossa existenta tenor art.11 ha quei negina influenza sin il temps da ruaus

dalla fossa. Il ruaus dalla fossa vegn en quei cass quintaus cun il datum dall'emprema sepultura. L'exhumaziun d'ina bara avon la spiraziun dil ruaus da fossa ei scumandada. Per excepziuns ei il departament da giustia, segirtad e sanidad cumpetents.

Art. 23 Temps da ruaus per urnas

Il temps da ruaus per urnas cuoza da principi 20 onns. Tier nischas che cuntegnan treis urnas vegn il temps da ruaus quintaus cun il datum dalla emprema sepultura. La suprastanza communal sa, sin damonda dalla parantella, lubir ina reducziun dil temps da ruaus per urnas da maximum 10 onns. En cass da munconza da plaz ella preit dad urnas sa la suprastanza communal ordinar ina reducziun dil temps da ruaus da maximum 5 onns.

Art. 24 Revocaziun da fossas ed urnas

Ei il temps da ruaus dalla davosa fossa d'ina retscha spiraus, vegn la retscha sligiada si. Aschi-lunsch che la suprastanza communal ordeina suenter la spiraziun dil temps da ruaus la dismessa d'ina part dil santeri ni dallas urnas ord las nischas dalla preit dad urnas, ha ella da comunicar quei silmeins treis meins avon il termin da dismessa publicamein e d'informar ils vegnentsuenter. Sche la dismessa succeda buca enteifer il termin fixau vegn dau incarica al causanteri sin donn e cuost dalla parantella.

Art. 25 Taxas per satrar en fossa

Per defuncts domiciliai en vischnaunca vegn pretendiu in taxa da frs 300.--. Per personas buca domiciliadas a Siat incassescha la vischnaunca ina taxa per cuvierer las expensas sco per exempel per cavar e curclar la fossa, diever dalla caplutta da morts e per far las preparativas da sepultura. La taxa munta à frs 800.--.

Art. 26 Taxas per urnas

Per il diever dalla preit da urnas e la platta da crap d'inscripziun che la vischnaunca metta a disposiziun vegn pretendiu ina taxa da frs 300.- per defunct. Per personas buca domiciliadas a Siat incassescha la vischnaunca ina taxa da frs 800.--. En la taxa per personas buca domiciliadas a Siat cumpeglia era il diever dalla caplutta da morts e las preparativas da sepultura.

Ulteriuras lavurs che la vischnaunca sto prestar vegnan tschentadas a quen tenor uras da survetsch.

V Mieds legals, determinaziuns transitoricas e finalas

Art. 27 Determinaziun transitorica

Cuntravenziuns encunter quei uorden vegnan punidas dalla suprastanza communal.

Art. 28 Protestas

Recuors enviars decisiuns dalla suprastanza communal ein d'inoltrar en scret enteifer 30 gis alla dergтира administrativa dil cantun Grischun.

Art 29 Abrogaziun da determinaziuns cuntradictorias

El mument che quest uorden passa en vigur vegnan tuts conclus da vischnaunca ch'ei cuntradictoris a quei uorden abrogai, specialmein igl uorden da santeri dalla vischnaunca da Siat dils 19.01.1996


Art.30 Vigur

Quei uorden da sepultura e santeri entra en vigur entras l'approbaziun dalla radunonza communal dils 04 da december 2009

Il president communal


Gregori Cavigelli

La canzlista communal


Alfonsina Cahenzli